
HANESAN MARIA: INAN NO DIXÍPULA sira NE'EBÉ BUKA SENTIDU

(Retiru fulan FEVEREIRU 2022)

Prezensa lokalizada: “Iha ne’ebá iha Jezús nia Inan. Jezús ho nia eskolante sira simu mós konvite ba festa kazamentu”. (Jo 2,1-2)

Ita la lee katak Maria to’o Kaná ka simu konvite, nia halo parte ambiente nian. Jezús fali la iha bainhira hahú pasajen Evanjellu nian, Nia mai husi liur. Foun-foun Jezús hanesan bainaka bain-bain: nia no ninia eskolante sira parese halo parte grupo ida nian ne’ebé la tau matan ba organizasaun.

Jezús nia inan **iha**, no Evanjellu la temi nia naran; la’ós tanba João la hatene nia, tanba João hatene ninia aman (Jo 1,45.6,42). João bolu nia ‘**inan**’, **ida ne’ebé jenera no fó moris**. Inan nia papel istóriu-salvífiku mak *introdús Jezús iha mundu, hamata Nia iha umanidade*.

Maria partisipa ho **atitude ativu** no apresenta an iha ambiente relasionál. Festa kazamentu nian celebra domin kaben-na’in sira nian, liufali festa sira seluk, no akontese iha rede relasaun sosiál, familiár no amizade nian.

Nia mak mosu uluk. Nia la subar an. Nia la’ós izolada, mesak, **nia hatudu katak nia envolve an** no pertense ba grupu ida ne’ebá. Ema bele nota nia. Nia atitude fó ba nia importánsia privilegiada. Nia prezente **iha ne’ebé presiza**, iha fatin hotu hodi antisipa kazamentu la’o di’ak no loos.

Ita hakfodak hodi haree katak bainhira nia mosu, nunka husu saida mak akontese, maibé hatudu katak nia **hatene realidade**. Ida ne’e dehan katak nia hatene rai. **Nia rai** Jezús nia ba-mai no ninia projetu atu la kuran buat ne’ebé nesesariu. **Nia apresenta an nafatin bainhira situasaun difisil liu**. Se ita hanoin ba Jezús nia moris publika, ita haree katak nia prezente de’it bainhira: ema foti lia hasoru nia oan, ko’alia aat nia, bolu nia bulak, bainhira duvida kona-ba ninia identidade ka orijen, iha momentu espesiál krús nian (Mt 12,46-50; 13,54-58; Mk 3,22; 3,31-35; Lk 8,19-21); no iha Kaná, bainhira tua la iha.

- Katak sá experimeta Maria nia atitude permanente, atu *prezente, horik* iha ne’ebé ema presiza ita?

- Ita horik iha kontemporaneidade nia fatin no skenariu sa de'it? Ita prezente iha sira ne'ebé nu'udar Moris konsagrada? Oinsá no ho modalidade sa de'it *ita tau ita-nia* an iha realidade? Oinsá ita sai Auxiliadora nia prezensa iha tempu susar ne'ebé ita sei liu daudaun?

Feto dixípula sira tuir kriteriu igualdade nian

Maria hatudu an iha Evanjellu dahaat ne'e, *ne'ebé interpreta hikas fali aspetu **tatuir** nian* (follow up). Jezús nia inan **halo parte comunidade ne'ebé tuir Jezús**, nia sai **dixípula**. Nia mak **fiar-na'in dahuluk**, nune'e nia ema dahuluk ne'ebé halo dalan husi Israel (kazamentu tuan mundu nian) to'o Kreda (iha ne'ebé simu dixipulu hotu iha Dixipulu ne'ebé Jezús hadomi). João nia comunidade, ema sarani ne'ebé ezemplár, ida ne'ebé modelu ba fiar-na'in sira hotu mak feto ida, Jezús nia inan, no continua hanesan ne'e.

Komunidade ida ne'e espresa ninia laran metin ba Jezús liuhusi **tatuir**. Ita mós hakarak sai Jezús nia dixípula sira, hodi sai ema ne'ebé **haksolok, fiel no fekunda**.

- ✓ Maria hola fatin sa de'it iha ita-nia comunidade sira? Oinsá *ita husik nia jenera ita* atu sai ilas moris nian kona-ba ninia Oan? Oinsá ita hala'o ita-nia sasin ksolok, *laran metin no fekundidade* nian?

João nian karakteristika propria katak nia rekoñese **feto sira nu'udar dixípula** kualifikada husi Mestre rasik (inan: 2,1-12;19,25-27, Samaritano: 4,1-42, Marta: 11,17-37, Maria: 12,1-8, Maria Madalena: 20,1-18).

Ida ne'ebé hala'o dalan dixipuladu nian hatene hela maski hetan sirkustansia aat, no buat ne'e liuliu ita, feto sira, bele komprende. Iha João nia comunidade feto sira hola fatin ne'ebé domina. No mós, Marta husi Betania nia profisaun ba Jezús, supera Pedro ninia profisaun, ne'ebé halo Kreda foin hahú rekoñese Pedro nu'udar autoridade.

Marta mak figura paradigmátika iha João nia comunidade, tanba nia mak pronunsia konfisaun fiar nian: "Ha'u fiar, Na'i; ha'u fiar katak Ita mak Messias, Maromak Oan, ne'ebé atu mai iha mundu."

Elisa Estevez dehan: "Kondisaun feto nian la esklui nia atu sai modelu laran metin nian ba fiar-na'in sira. Maibé, tansá tuir mai Kreda minimiza feto ida ne'e nia konfisaun fiar nian, bainhira nia ko'alia hanesan Pedro tuir Evanjelu sinotiku sira? Pergunta ida ne'e ezije dezafiu ida: sai konxiente dala hira ema haluha feto sira,

halo sira hela nonok no oinsá rekoñesimentu ida ne'e determina mudansa atitude nian, liuliu iha feto sira rasik."

- ✓ Iha momentu sá de'it ita moris *protagonizmu femininu forte*, iha dixipuladu hamutuk ho ema sira? Oinsá ita esperimenta iha comunidade relasaun sira amorevolezza no ternura nian ne'ebé halo posivel Eukaristia sai permanente no loronloron nian?

Moris ho sentidu

João nia Evanjellu tomak, husi uluk kedas, foka ho klaru ba "*kauza final*", ba "*tansá*" (Jo 20,30-31). Ida ne'e mak kestaun ne'ebé ita tenke konsidera iha foin-sa'e feto eh mane sira nia akompañamentu durante sira-nia prosesu vokasionál. Dala ruma, ita rasik lakon/la hanoin ba ita-nia moris no ita-nia konsagrasaun nia *tansá*, no ita presiza "*fila fali ba domin dahuluk*", ne'ebé hetan fali signifikadu iha "***sim, ne'ebé hafoun iha tempu***" (Ap 2-3). Ikus liu, iha ita-nia prosesu moris nian no iha ita-nia istória fiar nian, ***moris ho sentidu*** halo ita buka *modalidade atu moris no atu fô hikis fali naran ida ba ita-nia identidade...* ita presiza anima an atu halo ***opsaun atu...***

- **Rekupera** sentralidade evangelika, moris ita-nia konsagrasaun ho radikalidade no entuziazmu foun, atu sai sasin kredivel kona-ba Jezús nia tatur.
- **Fila fali** ba hun dixipuladu nian, hahú husi esperiênsia ida kona-ba espiritualidade ne'ebé integrada atu, husi esperiênsia ida ne'e, ita bele hamoris fali ita-nia comunidade sira.
- **Umaniza** prosesu komunitariu sira no formasaun ho modu interjerasional, interkultural, interkogregasionál, interdixiplinár, hodi fô biban ba jerasaun foun sira atu dezenvolve sira-nia vitalidade no oferese sira-nia presente, atu sira sai profesia ksolok no esperansa nian.
- **Asume** formasaun nu'udar dinamika permanente, ne'ebé halo ita moris integralmente nu'udar sasin, ho konxiênsia kona-ba Moris konsagrada nia vokasaun mistiku-profetiku-misionaria.
- **Favorese** foin-sa'e sira nia akompañamentu, hodi rona sira-nia hakilar kle'an liu iha dixernimentu evangeliku nia dinamika sira (haree - hanoin teb-tebes - nakfilak an - empeña an), nu'udar proposta vokasionál ne'ebé tulun sira atu deskobre sira-nia moris nia sentidu.

- **Akompañia** família sira nia moris, iha sira-nia haka'as an no sira-nia misaun edukativa, nune'e sira bele haburas, iha sira-nia an, valór sira, mehi sira, esperiênsia sosiál no espirituál sira ne'ebé habiit sira-nia relasaun tomak.
- **Kontinua** buka estilu foun atu moris no hala'o misaun edukativa iha komuñiaun ho leigu sira, hodi haburas ita-nia identidade nu'udar Família salesiana hamutuk ho sira.

Ita remata hodi afirma katak buat ida de'it fó dignidade ba ita-nia moris no konsagrasaun: **Domin; Maromak Trindade** nia domin, ne'ebé horik iha ita no ita horik iha Nia. Ita-nia adesaun vitál ba Domin ida ne'e mak realidade fundamentál. Domin ida ne'e sai fali **fekundidade vokasionál**, jeneratividade nia ksolok, ne'ebé transforma ita-nia comunidade ida-idak iha knotak ida, ne'ebé hatene provoka iha foin-sa'e feto sira pergunta kona-ba **sentidu moris nian** no deseju kle'an atu haraik moris ne'e ba Jezús, ba ninia Reinu.

Ita simu konvite atu *promove festa hodi servi moris no ksolok*. Ita halo diálogo ho Maria kona-ba ita-nia fatin iha festa, ita-nia nesesidade atu celebra no atu evita katak tua lakon ninia sabór no sai... tua sin.

Karik ita kuran atu manifesta ksolok ne'ebé ita dehan katak ita lori iha laran, "laran liu" to'o pontu katak dala barak la hatudu ksolok iha ita-nia oin. Sasin felisidade, ksolok, no umorizmu nian la'ós kestaun otas nian, ka ita na'in hira ka rekursu ne'ebé ita iha.

Moris Konsagrada nia forma foun hatudu ksolok ne'ebé hadaet no dada foin-sa'e feto sira ohin loron nian, tanba sira ko'alia kona-ba laran metin, empenhu, kazamentu, aliansa sira.

"Evanjelu nia ksolok hakonu ema ne'ebé hasoru Jezús nia fuan sira no moris tomak", ne'e mak fraze dahuluk ida husi Papa Fransisku nia majistériu; ohin mós bele sai espresaun klara liu kona-ba ita-nia sasin evanjeliku no moris ksolok, hamutuk ho Nia no iha Nia.

"Ksolok mak sinál fuan ida nian ne'ebé hadomi liu Na'í" repete ho insistênsia madre Mazzarello no ksolok hadaet, naksira no dada.

Dezafiu furak tebes atu kria jhikas fali iha ita-nia comunidade ida-idak **"uma domin Maromak nian" iha klima festa, gratuidade no ksolok nian**, atu ita sente domin, konsagrada no espoza Jezús nian!

Sim duvida, **ksolok sei sai sinál klaru liu husi proposta vokasionál** ba foin-sa'e feto barak ne'ebé sente bolun atu halo parte ba ita-nia família!